

小倉山房詩集

小倉山房詩集卷二十四

甲午乙未

錢唐袁枚子才

新正七日孔南溪太守來隨園卽事有贈

春正東風柳正含故人五馬忽停驂關心宦海尋耆舊
屈指晨星只二三九十慈親扶杖見兩行稚女學庭叅
同年直用家人禮滋味從來老最甘

山裏房櫳九曲成者番把手更同行穿林白髮烟中語
帶雪紅梅水上迎清福偶然歸小隱交情如此亦前生
別君未盡思君意聽我胥江打槳聲

題陶太守東井品泉圖

晉之士五施平晉之泉冽以清無人能取之往往羸其

瓶一解東方千騎忽來陶君授舍興氓童冠如雲執經

問難簇簇相看君爲辟呬舌燥唇乾二解乃取茗筮得

卦之井曰伯益所作利民最永鑿之扣之勿短其繩三

解一期窮源萬斛滂然且甘且鮮照影蹁躚考唐人水

部三億三萬三千無此一泉四解皤皤父老槃散行汲

粲粲門童淳至講習高梧之旁碧峯之側牽繩者僂煮

茗者暖民曰聖水士曰教澤五解昔有東先生請天三

日甘雨零今有陶刺史掘地七丈得泉水千秋兩賢人

先後濟其美六解口傳懼訛碑鐫懼磨民愛云何爰繪

井圖君子作歌七解

同桂郎諱春儀徵泊舟燕子磯有懷熊蔗泉觀蔡

賦詩却寄

六十明年屆三春敢不遊閒情拾芳艸打槩下真州柳絮風初軟桃花水亂流日長人渡緩蕭寺且勾留

小字桂枝仙錢郎劇可憐肯歌周史曲同泛鄂君船挽手勝扶杖吹簫屢拍肩妙蓮花不染恰是並頭眠

燕子磯邊泊黃公鱸下過摩挲舊碑碣惆悵此山阿山有

升文端公勒石詩短髯皤皤雪長天渺渺波江神如識我應送

好風多同年袁文達公自言爲燕子磯水神

江左熊觀察當今白傅才別來才兩日相憶已千回步

月筇應健看花眼可開公病後足跛目盲矣瑤華託誰寄仍遣玉

人來信托桂郎帶回

蘇州彭芝亭大司馬招飲西園奉呈三首

神仙丰骨鶴精神天遣長扶大雅輪七十高年雙黑髮
兩朝元老一詩人亭臺黠綴昇平景魚鳥追隨獨樂身
閒倚雕欄思往事百花頭上有餘春

公丁未第一人

乞身疏廣久懸車聖主頻頻問起居立雪公卿千里

至趨庭仙佛一家俱

公次子官侍講四子奉佛

龍門高比諸天上鉛

槩勤于未仕初聽說鄉隣齊側耳書聲夜夜老尚書

野人弱冠識歐陽彈指于今四十霜學禮早從周太史
渡江先拜魯靈光受知貧賤恩尤重共隱林泉味更長
願借西園一杯酒後生前輩話滄桑

寒山觀瀑布旁有少年奇雅郭姓名淳字元會吳

下諸生也談久誤易其扇歸次日見訪乃題兩絕句而還之乾隆甲午三月十九日

流水聲中問姓名
寒山影裏序平生
多君玉立亭亭態
可是東京郭子橫

取看紈扇置懷中
忘却歸還彼此同
搖向花前應一笑
少男風換老人風

四月四日保礪堂朱立齋兩叅戎常東湖楊鏡村
兩明府相約看花雨阻不至戲寄二首兼贈芝仙校書

誰挽銀河種玉蓮
橫塘一路水如烟
小車迎得靈妃步
不是雲仙是雨仙

孤負蕭齋酒一卮將軍令尹盡來遲如何舉世看花眼
不看人間第一枝

留別南溪太守

年年吳下往來頻此日登車屢看身分手慚難垂淚易
大家都是六旬人

平生筆墨等塗鴉底事知音有伯牙千幅魚箋書不了
教儂手腕脫君家

斯人風骨最峻峭霜蕭南衙冷似冰爲欸三生狂社牧
幾宵花影漾紅燈

愛犀山來更及烏金錢頒賜到與夫問君一勺廉泉水
除我曾分別客無

已投車轡并闌邊更繫驪駒薄暮天臨去故人如落月
得留一刻也欣然

十年不召老淮陽宦海升沉莫慨慷一个蘇州韋太守
至今名姓壓侯王

桂郎歸後是夕客寓憮然不能成寐

春未歸時花已歸落花那識晚春悲分明一樣燈前坐
斗覺寒生恰爲誰

浮生聚散苦情多五日纏綿奈汝何今夜江城月如雪
玉人何處一聲歌

吳門返棹曹郎玉田傲桂生故事送余京口

不肯離花過一宵花迎花送兩回潮桂枝月下香才謝

玉樹風前影又飄何必吳娘夸打槩但逢子晉便吹簫
笑儂雅抱生春手到處鸞絃續斷膠

輓太傅錢香樹先生

卿雲舒卷自丹霄魯殿靈光影忽凋無復東南稱二老
有誰簪笏歷三朝爽鳩早正秋官席威鳳仍賡虞帝簫
此日哀榮人世畢海天堯率更逍遙

未老先懸七十車江湖魏闕意何如密修寒朗祥刑疏
不上公羊斷獄書風貌九重圖影後溪山一片晚香
你傷心蓬島騎鯨去天語猶聞問起居

百年大雅獨扶輪筆下龍蛇紙上春一品集成傳海內
五湖花好稱吟身朝無燕許傷前輩家有韋平慶後人

想歷恒河千萬劫鶴歸華表尚精神

記泛扁舟碧海東自提行笈學登龍九河不棄蹄涔水
一面曾欽泰華峯看和 聖君新筆墨聽談 仁廟舊
儀容而今回首都成夢又隔人天萬萬重

牡丹花絕少並頭者真州吳園忽有此瑞三月八
日副使張東臯招同賞宴爲倡公讌詩一章而
別贈花三絕句

尋春古真州無春雙目閉春恰知我來開花比常興賢
哉張大夫指我看花地追尋碎礪園遍歷維摩寺車小
穿林幽艸深得路細果然鼠姑花雙開色奇麗其旁仙
種多環立擁霞帔送客出紅雲分香入酒氣昔聞韓魏

公金帶表花瑞君今宰相家花也如相示兒女合歡心
陰陽調變意遠鐘一以鳴嘉賓亦既醉我呼乘下舟不
借南衙騎如別華鬢天悄悄下塵世人花兩難忘作詩
當作記

並頭牡丹詩

兩枝春作一枝紅春似生心闌化工遠望恰疑花變相
紀央閑倚采雲中

讀罷清平三首詩此花猶未解相思想因移種長生殿
便學人間連理枝

各抱芳心雨不降飛來蝴蝶也成雙老夫振觸圓關夢
底事單身又渡江

秦淮小集招揚州女校書王氏爲藍公子酌飲越
三日公子入山問卜妾故事方知彼姝已登遶
室艷此遭際各賦催粧

邗上女兒白袷衣青溪公子踏青歸相逢一笑偶然事
頃刻落花天上飛

家本鄆鄉大道王一雙眸子截秋光比肩不笑妾身短
挽手愈憐郎意長校書著彩才二人許

折柳何須問舊條小星婚禮要人教開箱乞與官奴帖
筆筆泥金照樣抄

淮水盈盈綠正酣兩家全住板橋南桃根迎接開門是
不待終朝已采藍

十三樓事久蹉跎冷落尚書却扇歌今日辦香郎努力
有人想作小橫波

風月平章老去身年來着手便成春只緣遊得天台倦
看見桃花指向人

吳下歌郎吳文安陸才官供奉大內已有年矣今
春爲燕親故乞假南歸相過虎邱畧說天上光
景且云此會又了一生余亦惘惘情深凄然成

咏

宜春苑裏歸來客三十年前識面多絕代何堪都白髮
貞元朝士更如何

握手臨歧話再逢淚痕吹下虎邱風自言身比天花墜

一到人間一世終

題梁景山畫竹送往和州

景山先生春滿手筆底烟雲無不有畫石能移泰華來
畫泉能使波濤走隨山有絹二丈長先生爲寫千箇簞
頃刻堂上綠成海疑有么鳳隨風翔畫畢匆匆辭我去
云將采石磯邊住欲取長江作硯池好教萬象歸毫素
果然高士自不羣人間偏仄難棲身看他來去飄然意
便是瀟湘水上雲

送座主大廷尉鄧遜齋先生還蜀

海內年來只一師又聞予告作西歸六旬晚景人難別
萬里川江鳥怕飛廷尉清卿行色冷開元初載老臣稀

絳帷絲竹程門雪再說今生事恐非

記得初來拜後堂桂花香裏綠衣郎此時期望心何限
自覺韶華海共長漸漸黃門雙鬢白蕭蕭陸氏一莊荒
祇今送別酬恩意剩有衰年淚數行

鳳齡嫁某郎半年爲其大妻所虐雉經而亡余悔

恨無已賦十六韻哭之

萬悔其何及千牛挽不回總緣吾負汝轉使愛生災遠
把文姬贖權爲弄玉媒私情阿姊問密意舉家猜花不
嫌春老根思傍舊栽自慚黃髮短未稱紫雲陪妙選乘
龍婿偏招駑馬才妬妻威似虎魔母冷如雷鬢上環簪
卸房中膳飲裁淒清同病蝶呵叱過重儻鳥急籠應放

魚驚網莫開終年芳訊斷一夕惡聲來弱燕空梁墮孤
芳猛雨催早知投苦海悔不嫁哀貽返壁心猶在憑棺
念始灰伯仁由我死羞而見泉臺

題童二樹畫梅

童先生居若耶一隻小艇劃春綠一枝仙筆畫梅花畫
成梅花不我貽遠寄瑤華索我詩我未見畫難咏畫高
山流水空相思吾家難弟香亭至口說先生真奇士孤
冷人同梅樹清芬芳人得梅花氣似此清才世寡雙自
然落筆生風霜杜陵既是詩中聖王冕合號梅花王愧
我孤山久未到朝朝種梅被梅笑如此千枝萬枝花不
請先生一寫照

送雲坡觀察遷少司寇入都

一符丹詔下雲中，士女攀轅拜下風。
知道朝廷需魏相，可堪東海去于公。
看山走馬秋逾好，破格遷官眷最隆。
內外祥刑都管領，總緣民命壓宸衷。

今春三月掃門時，得見烟霄海鶴姿。
霜肅南衙朝折獄，尊開北海夜論詩。
卿雲此日還朝宇，大雅何人更主持。
頭白袁絲知已少，再來吳下倍相思。

去年九月十七日同蕉泉觀察賞菊有詩，今年重
到此期而觀察已亡，十日撫今傷往，泣弔四章。
又到黃花節，誰將白髮招傷心。追往事同醉，是今宵
影燈仍照衫痕酒未消。如何凋玉樹，總帳雨蕭蕭。

十五登科第三朝舊世家軍機叅密勿旌節擁長沙早
貴身原弱多情壽自差一場春夢短風捲鏡中花
歸隱秦淮好開門種蔗種病猶勤拜起貧不廢笙歌僕
喂花間飯兒扶月下坡今朝捲簾處遺像對烟波
山翁知己少動輒舉君觴正擬千場醉俄驚一笛霜無
人同笑語有壽益凄凉爭免衰年泪相思便數行

山中行樂詞十二首

門外豈無事山中只有書一篇小園賦半世好家居楊
柳風前楊梅花雨後車意行隨所適不樂復何如
怪石堆三品新隄造六橋艸堪供鹿砦萍足養魚苗摘
蕊求花大開池便櫓新客來茶不設甘露在芭蕉

鶴竹立門外一家藏綠陰欄干三四曲樓閣幾重深雲
影淡搖鏡壁風時弄琴階階聽外鳥也學短長吟

九十高堂壽千燈上下張環山生火樹搖水動珠光隔
岸笙歌助傾城士女狂此時一杯酒真个紫霞觴

十二紅絲視輪流侍主人分班常賜沐着手便成春作
楷門生代袂塵小僕頻爲他閒不得連日召龍賓

涉世無成見隨吾杜德機書多簪校嬾花密剪裁稀捲
袖常污墨迎賓忘着衣公卿與寒士來者便依依

白鶴一聲語青天半夜風夢從秋後短詩向枕邊工隔
夜硯常濕曉牕燈尚紅是誰來拭几知我讀書功

九曲琉璃屋玲瓏影莫分湘簾千竹映詩卷萬花熏髹

几新襲樣雪軸古篆文不知陳榻上留宿幾重雲
何物供閒戲圍棋亦偶然買碑爭舊榻染筆試新箋食
品何曾纂茶經陸羽編搜奇兼志怪俱是小游仙
客來無底事開口便談花解珮長千里吹簫阿子家山
深春不老風好月難斜幾個人間叟如儂度歲華
無兒家累少稚女戴男冠畫賞過時賣梨閒借客彈非
禪心更達勿藥體常安靜裏尋忙事巡簷數竹竿
一望參天柳都從手植生樹猶先我老心合比秋清鄭
重分陰惜編排著作成劉伶休荷鍤門外卽先塋

晚登清凉山

上山訪僧僧寺鎖孤亭荒荒紅日墮萬家炊烟直復斜

幾行雁字右復左長江半向樹梢出石罅盡教落葉裹
怪他啼鳥盡驚飛惟有白雲不讓我

客來

深秋萬木凋一花不著樹客來道有香主人不知處

上渤海相公二十韵

不到艱難際安知柱石功黃流遷故道赤子厯宸衷
隻手銀河挽兼旬板築終單車來水上萬口活溝中命
向龍宮奪春回黍谷窮堤方歌瓠子甲又起山東半壁
金湯重三江鐵騎雄帝教擒白賊公自挽雕弓渭野
勞諸葛彭城卧老熊刀光千里雪旗影半天虹傳箭妖
星落鳴蜚羽孽空亂時須重典雪後要春風鞞偃干戈

畢安排米粟豐孳孳動哺啜漸漸轉疲癯更把潘屯鑿
長看挽運通開潘家屯引黃水運漕救時其魏相活國賴姚崇令
子秋闈試泥箋姓氏紅九公子廣德新舉京兆總緣隆世德默眷
白蒼穹暇律新陽轉稱觴往事同銘勲兼祝嘏稽首指
崑崙

簡齋印有序

湖州洵井得銅印鐫簡齋二字陽文深一米許
宋蒙泉明府以余字偶同遠寄相遺按宋史陳
與義字簡齋曾刺湖州此印當是陳公故物喜
紀以詩

我非長卿才敢冒相如字或者蔡邕生卽張衡轉世先

生銅篆文向我肘後存較勝王半山突然爭一墩篆古
銅沁綠逢箋押滿幅竊馬與盜符何由知非僕頗疑先
生靈有意留贈我不信請觀詩心心相印可

攬鏡

朝來攬鏡不覺惱衰絲
衰絲汝竟老面色斑斕似凍梨
鬢毛飄飄如蓬葆記否當年試殿中
王侯簇簇看終童
金蓮歸娶西湖月玉節臨民滄海東
爾時只道長年少
老隔鴻溝不到誰知清晝六時長
漸漸晨光變夕陽
朱顏綠鬢去無迹老似奇兵遽相逼
我未分明鏡已知
強夸豐鑠終何益
擲鏡啞然笑向天
大書綠字焚霞箋
不求藥不求仙只求還我當初美少年

沈凡民葬南門外湯家窪因其無兒爲植楸祭傷

梓樹日盛而予年日衰書此以告凡民

君薨十三年我來如一日君墳松益青我頭髮愈白離
離東郭陳脉脉紙錢焚從來友朋意轉比子孫真一事
君知否我年五十九再來恐不多多斟一杯酒酒滴棠
梨花驚飛雙老鴉似代君作答向我啼啞啞

喜梅軒太守從淮安調任江寧

金陵新太守東海舊騷人郡領三江首花看六代春一
陽回暖漏五馬駐雕輪知道神君到風先掃路塵

八月黃河決淮城浪幾重扁舟援士女赤手鬪蛟龍局
定肩才卸民蘇力已慵青溪此間好安穩采芙蓉

作吏談文藻高風久寂寥得公扶大雅如鳳下丹霄白
傅西湖槩東坡赤壁猶心香留一瓣千古暗相招
先生來恰晚賤子早歸田記得庭叅日于今三十年白
頭雲外影紅燭畫堂烟此後追隨處公餘更散天

見太守案上抄校文字皆少年未定之作不知得
從何處心爲報然袖歸改削再呈而先以詩謝
南衙酒置一尊清案上書翻兩眼驚悔把文章留少作
竟教傳寫到公卿花因早采香猶薄琴是初彈手尚生
願學女兒再梳裝他時相見倍傾城

除夕

年年除夕側耳聽爆竹聲聲直到明今年除夕聽不得

雞唱一聲人六十大撓甲子已刪除縱有光陰是羨餘
雞若相憐緩開口依舊我還五十九

雪橋十二韻

戲把三冬雪裝成五尺橋關干雲母琢坡級水精雕有
路瓊林近無波洛浦遙虹梁初卧地銀海不通潮踏恐
青鞋汚行宜素手招弓垂形宛轉驚立影飄蕭玉杵聲
聲軟蓮花步步嬌斜陽烘反濕涼月照難消白盡禪僧
足高分砌石標漸低疑地陷小缺是風撩冒險將扶杖
防鬆更築欽須知仙意冷度世不終朝

六十

六十華年轉眼更萬般往事無心驚儘憑朝士呼前輩

尚有慈親喚小名
早到蓬山春夢短
老歸邱壑舉家清
他人祝我非知我
自疊雲箋寫一生

卅載青溪奉板輿
楊雄文可似相如
安排歲月歸清福
笑看雲烟過太虛
若肯經綸原解事
偶貪花竹竟閒居
年來剩有騎人處
九十瑩堂萬卷書

懸弧時節百花嬌
三月初三柳正飄
客采碧桃來插帽
天教黃鳥替吹簫
稱觴禮古儀
文俗扶杖身輕髣髴
影州
寄語諸公休勸酒
醉人何必定今宵

語兒亭上斷前因
想爲香山作後身
腰脚率同猿鳥健
鶯花還比子孫親
百年再算無多日
一代能傳有幾人
從此光陰倍珍重
高歌樂府惜餘春

看梅鄧尉遊程氏逸園園主在山老人外出矣題

詩留贈

平生擬造屋數間前橫莽莽水後立蒼蒼山奇花古樹
左右盤此景不可得思之年六十忽然鄧尉看梅花梅花
引我仙人家入門勝景爭迎面頗似佳人驚乍見一溪
一石一房雲百折千迴屢變案上何所有龍威丈人
幾卷書階下何所有金光瑤草三千株初登清暉閣再
上騰囀臺清風颯颯吹麻鞋西山翠屏插天起太湖白
浪升堂來大魚喚向廳前語高鳥飛從腳底回我欲謝
真宰拍洪崖意中所結構此處都安排頭白始能到白
愧非仙才留連片刻已覺心神開居此一世之人何如

故憶昔曾遊五嶽早泰華奇峯都了了到此低頭口語
心仙家別有鄉娘好公超遠出女嬌迎謂王留我小住
金華庭白日已向扶桑沉一羣蝙蝠來吹燈揖別烟中
心惘惘山翁何處訪從來天際有真人不許相逢
只許想

在鄧尉憶家中梅花斃然有作

主人鄧尉看梅去家中梅花開萬樹舍近求遠如芸田
梅雖不害我自齎歸來置酒向梅勸勸梅莫作秋胡怨
君不見林逋終日不離花花飛也到別人家

重過蘇州菴園感贈主人

十年兩到得家池池畔仙翁正索詩風月亭臺添幾座

主賓鬚髮白千絲梅花尚識重來客啼鳥難忘舊宿枝
樓上藏春樓下醉許多往事上心時

三月三十日金棕亭學博招同十八友人送春平

山堂分體得六言絕句

學作惜春御史公然國子先生載酒廣陵城外詩人十
八登瀛

作殿牡丹漸落將離勺藥初芳賴到平山作別不然辜
負斜陽

我是白門殘客也來此地搗衣一片尋春心事如何轉
送春歸

棕亭拉至潘孝廉家賞牡丹主人素不相識席間

抗手知是張少儀同年女夫也分體得五絕二
首

隨人看花去直至花深處誰知花主人乃是故人婿
主人擎卮酒勸我吞紅霞我亦祝主人富貴如此花

鴉紗幮避蚊詩

蚊蟲疑賊化日落膽盡壯嘯聚聲蔽天一呼竟百唱如
赴闕聞市商謀抄掠狀如起烏合兵呖牙無主將刺鼻
便惹癰誤吞幾絕吭作鬧已可憎咀噉更何況我乃坐
一室方空作屏障甘學幽閉女將渠大庭讓先之牡鞠
熏繼以虹竿颺大索先十日當作刺客防風影再驅除
不容餘孽放出入必微行往來先掃盪果然別有天徹

夜安無恙外陣雖營營中心常蕩蕩豈無狼藉者勢孤
神不王餓久翅蹇蹇未嚙身先喪豈無出妄者肉薄爭
相向終隔一重城敢近不敢望我聞呂奉先彈箏坐錦
帳甲士三十人欲斫空惆悵又聞宋南遷爲避金主亮
幅幘雖褱爾湖山且跌宕世事無大小安身爲上笑
我亦雕蟲未肯蟲腹蘊一升墨水餐三世人血廣記
人身血惟洛陽荷蘆生耳彼雖禁籜看我已蛾賊抗公然紗籠中山
人亦宰相

遣興裸詩

聽得兒童笑語譁天機都在野人家荷花落處剛剛好
荷葉如盤托着花

三間草屋小溪邊竹裏開門地勢偏仙鶴住多人住少
白雲時得到窗前

五月黃梅雨打扉驚風掃蕩百花稀梧桐心上分明甚
不是秋來葉不飛

西山冷向水中青兩岸秋花似畫屏生怕夫容難照影
白牽漁網打浮萍

花裏荷花壽最長端陽開得到重陽秋霜吹落烟波冷
猶有蓮蓬子滿房

掃地焚香心太平衰年勤學有康成攤書愛坐西窗下
多得斜陽一刻明

應酬隨意少安排風替關門風替開正對幽蘭剝蓮子

阿誰花外送琴來

閒人自愧少閒情
滴露研硃手不停
才得吟成將筆放
女兒相喚捉蜻蜓

平生詩格愛三唐
白髮看詩興倍長
一個詩人儂最羨
邱爲八十有高堂

題江天雲樹圖送陶梅軒太守觀察廣東

蓬蓬江上雲渺渺
天邊樹十月太守來
九月太守去太守來
何遲淮上有災黎
太守去何連南海
需監司江東諸父老
無言淚潛墮爭忍一
年中春風吹便過
我道民胡然我有好
丹青畫民相思意
送公越王城

越王城下樹童童
千扶桑一朝拂慈雲
都作旃檀香君

家太尉公廣州留遺愛相隔二千年甘棠可猶在采風
如采珠佳士來于于驅蠹如驅鰐奇文繼韓作趁此扶
搖風遠作冲天翥記否荻蘆中同門有隱者

隱者無先容蒙公蒞茅茨乍見披膽肝新交如故知貽
我紫霞杯惠我紅絲硯每到論文時子面如吾而濯澠
一以合雲泥轉難分願化羅浮蝶來繞珠娘裙民送江
上拜我送山中揖望見公旌旗柴門猶佇立

苦旱

鎮日炎風旱不禁秧田望盡老農心夏雲總被風吹去
教作奇峯莫作霖

嘉興春雨老人摘楊梅汁盡牡丹花屬余題句

楊妃一口吐紅霞便是春風富貴花從此人間重真色
臙脂不到畫師家

樹齋侍郎從喀爾巴哈寄惠灰鼠裘二襲賦詩奉

謝并告裘猶未至

一封書到動經年紙上猶飛塞上烟有暇將軍能憶我
可知萬馬不窺邊地當絕域風霜早詔許攜家雨露

偏書中云古大宛地入秋即雪春陽同行

敬把佛香供手札憐他來自大

西天

寄我輕裘念我貧路迢芳訊竟沉淪疊來箱內雖無分

暖到胸中也是恩兩世春風慣虛領

牧上文瑞公詩云可憐桃李青青樹

盧領春風

一生卧雪有奇温只愁身上蒙茸服何日能

消別淚痕

題萬華亭持籌握算圖

十萬貫錢撐屋破面有銀光奴兩個衡石鏘鏘聲不停
貂裘者誰擁几坐疑是漢時桑大夫牢盆手握算緡銖
又疑梁朝蕭阿六紫標黃標自辜權誰知乃是華亭子
貧兒驟富畫圖裏描寫銅山付渺茫我憐其意笑不止
君不見金堂玉几居王侯屏風翻畫白蘋洲以有易無
互相羨世間萬事多環流又不見古莽之國以夢爲是
覺爲非夢中得鹿尚可喜何況開卷卽見青蚨飛黃禾
起羸馬有錢始作人求之不得畫之得匹如紙上呼真
真三十六爐鑄橫財登時張說稱名臣吁嗟乎凌烟閣

桐川圖此類丹青俱可無不若王戎真簡要一把牙籌
自寫照

十月十四日嗣香亭子爲已子取名阿通喜而賦
詩

阿侯抱向阿連家六十衰翁始作爺分得荆花原共蒂
養成小鳳白隨鷗裁衣預備身材長選乳兼需姆德嘉
兒亦有緣如識我萬書堆裏笑啞啞

筵開湯餅舉家懽晚景桑榆自覺寬妻妾無功兄弟補
園林有主水雲安關心野鶴聲相和回首斜陽影不單
只是翁衰兒太小客來強半當孫看

枯葉

草木在人間去來有時節枯葉戀高枝自覺無顏色

哭彭際光司馬

汶上甘棠樹尚青吳中鵬鳥已哀鳴卅年早結通家好

一薦盧叨座主名

際光余甲子薦卷

底事仲宣偏體弱要知叔

寶太神清回思月地雲階處多少琴尊總隔生

詩門新博好家居予舍晨昏百步餘

所居與大司才得馬隔一橋

才得

樊川棲杜牧已經秋雨病相如平生風調都成夢四面

溪山尚繞廬想見鶴歸華表日趨庭還侍老尚書

六十衰絲兩鬢華今春訪病到君家不能見客偏迎我

無復橫經尚對花久坐自知妨飲藥臨行未忍遽登車

傷心一揖階前別竟作人天萬古嗟

金賢村太守來自黔嶺小住秦淮七夕前一日率

諸侍者在駕隨園索詩作贈

群柯太守好風情吹竹彈絲過一生萬里歸裝無別物
侍兒添箇董雙成

兩家都有十個圓姊妹萍逢興不孤迎得雲仙剛七夕
藕花風裏說兒夫

換馬

姓也

當年興頗豪香燈涼月手相招而今相見添

惆悵似有心頭債未消

一朶瓊花態最幽十年前已遇揚州見卿不見雲扶妹

惹我滄桑萬種愁

壬午夏余尋春揚州雲扶妹爲迎耶姬相見余學蒼梧澆故事讓與賢村

今忽忽十四年雲扶以姬難亡久矣

康姬風調果超羣一笛吹開水上雲偏與表絲同小字

合教新婦配叅軍

余小字瑞官而康姬亦名瑞姑

小病恹恹白髮翁水窗權借板橋東如君才許秦淮住
十部笙歌拜下風

某明府以家姬見贈余却之已而聞其強死余轉

悔不受以拔之于苦海也自懺一章

花落當前手不援此身有愧救生船玉溪生最多情者
偏却東川張蕊仙

全集編成自題四絕句

不負人間過一回編成六十卷書開莫嫌覆襲些些物
多少功助換得來

幾年學道斂心情幾度刪除仗友生到底難消才子氣
霜毫觸處怒花生

七齡上學解吟哦垂老燈牕墨尚磨除却神仙與富貴
此生原不算蹉跎

學問原知止境難其如雙鬢已凋殘強顏且付麻沙本
一任千秋萬目看

小倉山房詩集卷二十五

丙申丁酉戊戌

錢唐袁枚子才

正月十五日園中飛下一鶴

一團白雪青天落園丁走報來仙鶴來自何方產何土
鶴不能言但起舞園中三鶴一鶴單物得其偶居之安
主人當作不速客取耆簪之敬終吉

哭座主鄧遜齋先生

有序

戊午科余與平西大將軍阿公廣庭同出先生
門下先生每稱分校得士一文一武今年正月
將軍平定金川而先生先一年捐館枚故賦詩
志哀先生諱時敏四川人官大理寺卿

當年絳帳同升客此日凌烟第一勛共說門牆原不忝
敢云文武竟平分名書虎榜三生夢甲洗龍沙萬里雲
告奠九原公亦笑是誰衣鉢有將軍

過瞻園弔託師健尙書

十年不見託尙書重過瞻園感舊居
匝地風花春事換滿牆烟墨雨痕疎
老臣力盡還朝後國士知深見面初
擬賦入哀詩未就幾行衰淚落衣裾

哭逸園主人

有序

主人姓程名鍾字在山吳之隱君子也與其妻
生香居士全有詩名所居逸園在西磧山下余
過訪不值次日君入城始得一見別後再投以

詩而君亡矣其佳句云高樓鎮日無人到賸有
山妻問字來可以想其風調

與君一見了前緣芳訊重投便杳然四海名園推梓澤
半生嘉偶伴伶元似知數盡將山賣子到園時聞已售與江氏定有
詩存待我傳西磧風烟太湖月從今不泛子猷船

鷄

養鷄縱鷄食鷄肥乃烹之主人計自佳不可使鷄知

送保將軍勵堂之施南

吳下驪歌夾耳聞我來剛值送將軍請看江上雙旌影
已似將飛一片雲

樓曳星辰劍上方偏教生性愛文章倉山幾曲風華調

君盡能歌我轉忘

千條紅燭兩枝花
餞別依依小杜家

開周

他日巴山聽

夜雨更誰行酒進琵琶

弓刀獵罷萬山青
風捲紅旗過洞庭
可帶橫塘一枝笛

夜深吹與老龍聽

善撫生苗與熟苗
追陪嚴武與韋臯
八風平處雙聲穩

一卷新詩卽六韜

送君南浦草萋萋
望見楊花首欲低
一樣天涯送行客

楊花能到夜郎西

過蘇州有懷南溪太守
新遷觀察轉漕北行

六十黃堂兩鬢清
一朝丹詔下神京
高年豈望遷官

職 聖主偏能記姓名
綏綏漕糧東魯去
煌煌衣錦故鄉行
長河月色三千里
萬舫齊聽號令聲

袁絲別後下姑蘇
悔作尋春范大夫
知己偶然心上有
美人真覺世間無
難將蘭漿迎桃葉
且坐甘棠聽鷓鴣
愁過南衙文讌處
旌旗人遠月明孤

哭侍衛明公

有序

公名仁將軍忠烈公名瑞者之弟
年少能詩在尹相國處見予
篇咏寄聲索贈予感其意書扇
貽之而公已從征金川歿于軍矣

遠蒙京國問才名
知己何曾一識荆
團扇詩才從北寄
雕弓人已賦西征
通侯門第文兼武
上將沙場死亦生

遙冀寒雲招左轂海天兜率盡交情

某學士已謫降矣猶責余不以公服相迎余雖謝
過而退後不能無詩

何苦蓬門閣閣譁私蛙猶道是官鞋一枝紅蓼雖孤潔
生就人間瑣碎花

眼入夜昏澁見燈輒掀戲賦一詩

薄暮雙眉蹙飛珠繞眼眶望洋空有嘆視物總如傷無
復宵攤卷何妨早就床譬如入世上原自沒燈光

秉燭宵遊與忽差倍教白日惜年華想來老亦多情累
兩眼渾如夜合花

升沉

山色蒼茫落照微升沉到處有天機楊花自繞蝶絲上
莫怪春風吹不飛

江西方伯楊西峯巡撫江蘇五月受篆寄賀四章
故人開府到吳中捧日葵花色正紅八座有誰堪此席
半生惟我最知公智珠在手風雲濶卿月當天氣象空
真個恩膏似流水大江西下大江東

金閨何處不甘棠回首春風二十霜

公宰昭文時年才弱冠

在昔

東廂聽鼓角于今南面握牙璋官從舊地遷才樂人是
相知喜更狂料得軍民齊額手中丞玉貌未曾蒼

記否當年聚白門兩家燈火話黃昏一餐不作常賓待

萬事都從絕頂論

公精廚饌他客不得與

宦海光陰流水逝棲霞

遊伴幾人存

謂莊潘諸公

而今半壁東南主爲我應留酒百

尊

小人有母受恩施客歲稱觴使者馳雙東水絲園客蘭
一行珠字白華詩情深膠漆真無忝分隔雲泥兩不知
寄語關西楊太尉相尋未敢出山遲

贈慶郎

寂寂朱門當館娃行行珠字傍
牕斜世間只有張公子

竹齋

解采華林

班名

第一花

蛺蝶雌雄且莫分女兒香贈女兒
熏遙知燒處雙烟起
化作仙童一朵雲

欲試芙蓉雨後妝青溪同浴兩鴛鴦
分明一掬僧房水

抵得華清第二湯

客恩寒重夜眠遲
贈汝吳棉有所思
願得他生爲翠被
鄒君身上覆多時

齒痛悶坐戲作長歌

前有萬古去漠漠
後有萬古來滔滔
當中忽放我一人
不前不後生今朝
孫曾以後之人物
不接見開闢以前
之史冊誰傳抄
徒然苦受倉頡累
四千年中文字來
煎熬就使學業追
孔孟勛業全夔臯
猶恐一朝乾坤毀
也如雲氣隨風飄
何況礚礚居空谷
寂寂守蓬茅
五岳不會走蠟屐
六十尙未磨旄旄
造化小兒漸欺我
齒痛呼暑聲嗽嗽
眼前未死先冥漠
詭談傳世不朽殊
無聊擬

學古之行樂人酒飲公孫穆色好公孫朝已爲財力所
制限名教所阻撓再欲將身送還天與地又被殘形恒
幹相拘膠只得支願枯坐無一語自弄筆墨當笙簫寄
戚高歌白石爛杞人自信青天牢方寸之間驅水火入
荒以外馳輪尻身隨黃傾青曾歿處歿竟憑白蜺嬰拂
招時招但願生生世世莫作有情物一任劫灰盪滌吹
我作泰山之頑石大海之波濤

再贈慶郎

三月春光上已濃笙歌人集水西東樹梢挂起燈如海
炤得紅兒分外紅

捲簾招月坐蕭齋意欲留春事竟諧寄語阿瞞私誓了

他生爭及此生佳

爲儂指引若耶溪笑上粧樓躡小梯奪婿吳娘真有福
吹簫全住板橋西

開過紅榴烏欲飛相思能不夢依依願卿身似春潮長
早到胥江晚卽歸

南溪遷江蘇司臬再賀一詩

孔戣久被天心眷重疊恩綸下玉坡千里人才瞻
舜日三遷官總聽吳歌舟因久泊風彌順花爲遲開露
轉多我與蒼生齊引領者眷報稱更如何

人老莫作詩

鶯老莫調舌人老莫作詩往往精神衰重複多繁詞香

山與放翁此病均不免奚況于吾曹行行當自勉其奈
心感觸不覺口咍啞譬如一年春便有一年花我意欲
矯之言情不言景景是衆人同情乃一人領

晚遊古林寺

一鐘打出滿堂僧佛面金光半閃燈籠樹無聲風小定
袈裟有影月初升講經未必花能笑拄杖微聞石欲應
底事空王夸解脫春來不解半池冰

余久離祿仕而戚里紛紛誣諉不已初頗厭之既
乃有悟于物理變瞋爲喜故作是詩

戚里紛紛太糾纏問思物理忽欣然樹堪避雨多棲鳥
水不通河少泊船石佛疲津雖欲問雲仙捨藥且隨緣

人求終北求人好平著心看卽是禪

卅年

卅年山館住悠悠十賚誰交陸敬游
揮處綠楊成古樹齋來黃口盡蒼頭
釣竿手餌魚難得棋局心忙子不收
只有吟詩如老將窮追佳句獲才休

野廟

白石神君廟黃車使者臨
客恩雞語慣僧頂鵲巢深
錦雨通宵暗金苔滿地陰
上和香一炷留贈古檀林

折花

看書時是看花時兩事商量割愛遲
只好折花書案供也聞香氣也吟詩

題宋人詩話

元聖雖不作何王不衰裳終日嗜菖蒲未必皆文王孔
子所以聖豈在不撤薑我讀宋詩話嘔吐盈中腸附會
韓與杜瑣屑爲夸張有如倚權門凌轢衆老蒼又如據
泰華不復遊瀟湘丈夫貴獨立各以精神強于古無臧
否于心有主張肯如轅下駒低頭傍門牆

悔軒太守長淮利涉圖

長淮泱泱浪拍山舟中太守日營然爲貪四顧眼界寬
船篷盡卸船帷褰蕩舟者急腰背彎擎楫者猛鬚連鬚
奚童持帽容清便飄飄華蓋風吹偏隄旁樹底聲喧闐
衙前散從將馬牽幾半雉尾衝寒烟弓刀旗幟鞍轡慢

一一錯襟楊花間問公何事心憂煎腰輿不坐偏扣舷
客秋河決黃淮連魚頭赤子相比肩救災如救野火燃
黃堂官作羣官先疏排貴迅築貴堅何者宜堵何者穿
非身親到心胡安民視公身如大船捫載萬戶利涉川
精誠所感神亦憐支祈可鎖鑿可鞭饑者與飯寒與棉
波濤聲裏頒金錢非公孰把 皇仁宣雙漿播去重回
旋左視右視求萬全我聞史起能引泉河隄謁者稱王
延煌煌史冊相留傳以公作配何慙焉誰知公意猶拳
拳畫圖當作越膽懸道民受病難遽痊元氣可復須三
年此語公然直奏 天

悔軒一稔之中驟遷觀察再遷方伯索詩爲賀

兩度 恩綸下玉京三遷官不出江城風高太覺雲行
速惹得閒鷗聽也驚

更喜新衙接舊衙半條街近好移家官遷真個驚遷似
只隔一牆紅杏花

中山王府舊樓臺迎過 鑾輿花尙開此日遭逢勝元
九遷官兼得住蓬萊

東南民力近何如儒者經綸定有餘好惜分陰懷祖德
青燈還撫幾行書

北海尊開酒不辭匡衡翼奉本同師自憐三十年前客
合有瞻園老樹知

與公同出孫文定公門下

曾賦園中景十篇曾交碑碣記先賢而今得遇文章伯

合浦珠還豈偶然

託向書瞻園碑現
寄隨園公將歸之

哭高東井孝廉

有序

東井名文照湖州武康人高才博學父爲南捕
通判有廉名東井中甲午鄉試客死京師年三
十無子

風傳消息自幽燕聽說斯人不永年循吏兒郎好才子
一齊抹殺也由天

二十萬言書誦畢八千餘紙手抄忙不知一片心頭血
客邸誰收古錦囊

日空四海無前輩心折千篇有老夫此日等身諸著作
九原抱著見韓蘇

關情夜燭與晨燈甚矣吾衰仗後生豈料挈雲心事健
一枝秋桂了前程

題黃梁夢枕圖

非因非想夢難通人有心情各不同我過邯鄲曾有夢
夢攤書卷萬花中

心中賢人歌寄錢璵沙方伯

書中有賢人其人不可再心中有賢人其人宛然在其
人在何處閩江爲屏藩吾幼與同學吾長與同官溫公
愛蜀公生前爲立傳吾亦愛錢公意欲書其善公書善
歐趙公詩善白蘇以兩善稱公後之爲丈夫

天子南巡狩聖書頒誨誨誠恐供張費累彼元元民

江督黃文襄陰達而陽遵孤行一已意東下如濕薪其
人養威重上相不敢噴公乃手彈章焚香達 紫宸
天子立召見問汝所知因公奏御史官言事重風聞倘
問所來由是絕言者根 天聽爲之動將黃訓飭頻有
此小臣直彌彰

聖主仁一時王侯駭爭來窺公門以爲朝陽鳳以爲獨
角麟誰知公恂恂公貌如婦人

金吾有邏騎獐獍虎而冠內府四十名白日橫行慣公
視永豐倉此輩猶狎玩其魁名李五喧噪薄几案公怒
械繫之封章奏玉殿 詔命盡革除爲首者誅竄百僚
舞于衢路人相與嘆神羊挺然立百邪已消半何況鳴

一聲根株自痛斷

彰化內凹莊生番殺黔首賴白兩姓家二十有二口故
事番作惡武吏有責成生番殺人重熟番殺人輕大吏
爭護前各以熟番報公時巡臺灣獨以生番告洋洋海
風起偏遲御史章奏騎旣濡滯所奏又乖張 天語加
切責大吏滋不悅調者來調停誅公改前說公指憲前
山是豈可動乎苟其狗有位何以對無辜亡何矯虔吏
買頭作証証事發得上聞昭昭黑白定

三吳民風柔俗吏恣威福但博大府笑不顧小民哭公
莅觀察任上手無留獄其一竟劾去其一稍瑟縮蠹胥
搗五鬼積案掃千贖懷磚者改行舞文者抵伏片紙告

誠張萬民雪涕讀傳抄未停手曲踊時頓足可惜僅一
年旌旗遽入蜀民恨公來遲又恨公去速至今說公名
父老淚簌簌

古有班馬才能記非常事今有班馬才苦無事可記我
欲得公狀催公作郵寄公曰我生平碌碌無他異虛心
而實力祇守此四字大哉明公言四字談何易其惟聖
人乎當之庶無愧願公永勉旃徐徐俟其至我欲立公
傳恐公事正多我欲少遼緩又恐傳者訛故且托韻語
傳播爲詩歌歌公更勗公公其慎晚節空山有故人含
笑看史筆

題幽光集後

王陸樸至高文照凡二十餘人

河嶽英靈氣未伸有才無命最傷神何時得止韋莊表
追賜科名十六人

所見

牧童騎黃牛歌聲振林樾意欲捕鳴蟬忽然開口立

遠眺

秋江遠眺碧雲空一笑啞然對晚風鵜鴒覓魚終日立
不曾肥遯信天翁

留別蘇州主人唐靜涵

君家久住竟忘家兒女同聲喚阿爺借慣舊書多脫線
代栽新樹暫停花商量小食先呈譜座亂飛棋更闢臥
如此主賓能有幾戲將瑣事記些些

謝渤海相公賜老母人參

一朵慈雲下碧空
萱堂頃刻起春風
扶衰正想尋靈藥
造命由來屬相公
價比兼金千鑑貴
形如瑞麥兩歧同
殷勤手付家僮意
小草無言有寸衷

赴衙親
封賜之

公慮材官賚來有
費半賞故喚家僮

哭唐靜涵十二首

吳下霜飛九月天
唐衢竟賦小遊仙
傷心三十年中事
歷歷捫胸尚宛然

初飲華堂酒一卮
青年意氣兩相知
屏風窺客金釵滿
正是君家全盛時

奪得鸞篋返石城
三郎懊惱不勝情
是誰巧作鶯花主

不負黃衫俠士名

事載聰
娘墓志

從此雲龍角逐忙栽紅暈碧兩相將
棣華書舍三間屋便是儂家選佛場

寒山聽雪倚斜曛鄧尉探梅踏白雲
一輛籃輿兩枝漿嬉遊何處不同君

護世城中美膳難多君親手製盤餐
晨鳧北雁商量處忙殺何曾舊食單

龐公妻子都無避稽呂相思便駕車
笑我身如春燕子一年一度宿君家

爲喝臬盧六子紅驚心風浪太匆匆
忝爲北海孫賓石曾陪臺卿複壁中

漸漸清霜滿鬢來欣欣且喜老懷開
衣衫質盡長生鹿猶入花叢醉幾回

朱絃兩度斷琵琶聘得雲仙蔡少霞
一夜長眠人不醒繞床嬌女尙呼爺

今春置酒舞曹婆楚姊彈箏阿子歌
豈料人生真局促黃公壚下卽山河

早知此會成長別悔不勾留再一宵
量取長江盛老淚君寬舍我更誰招

閱歷

閱歷名場四十春一言常自說津津
久居軒蓋無佳士不讀詩書有俊人

昭君

妾彈琵琶非自傷傷心還是爲君王千秋幾個傾城色
一旦輕輕付遠方君王若果非知己妾亦甘心絕域死
如何賤妾遠行時詔書正選良家子良家子比妾姝問
旁人如不如

偶觸

偶觸危機黯自傷白頭無語立斜陽可能野谷空山裡
禁住梅花不要香

偶成

安身浮世外行止自徐徐白鷺替迎客春風爲卷書
吟罷白書竹茶烟吹入窻輕雲含雨重孤蝶得花雙

一月關門住忘書記復清詩情似池水都向靜中生

悼花

梅花盛開時杏花若相覲杏花正紅酣海棠有爭意一
花復一花循環作交替容華非不佳過者便憔悴春風
非無情不能將花繫開落曾幾時在花如一世旁有看
花人凄然自隕涕

玩月

無月夜可憎有月夜可愛忍把爛銀盤揮之出門外恰
思人未來滿地月橫陳如何人一來月光飛上身思之
不可得掬之若可取忽然疎影搖梅花如欲語

自懺

仙人九障名居一上士關防口最先安得四禪天上住
一生風不到牕前

和沈觀察遊華山韻

仙人掌上馭風行玉女頭盆拄杖聲兩角孤雲天一握
千尋飛瀑月三更近招白雁烟中語遠望黃河樹頂生
擬把綠章奏闔闔滿腔心事沈初明

造假山

半倚青松半掩苔一峰橫豎一峰迴高低曲折隨人意
好處多從假字來

感往事有作

并序

予爲鳳齡事至今悵悵因憶己巳春卜安平湖

有良家子楊氏許贈不許見事故中止及買舟
歸而其家追余往見則病作不能行矣嗣後或
交臂失或來歸後又遣去舛午膠牒不一而足
大有悟于佛氏因緣之說故作是詩

綺麗情懷閱歷身青天碧海漫尋春每看遭際千般幻
始信因緣兩字真花到手時偏不折壁從懷後轉生嗔
暗中竟有牽絲者笑我徒爲傀儡人

山頂蘭

一枝幽草植山阿開旣飄零落又多不是無人采香色
其如生處太高何

謝悔軒公饋烏鬚藥

買染鬚藥如買酒年年一介馳京口欣逢長者陶通明
肯賜刀圭變老醜每對明鏡愁鬚蒼便趨華堂索秘方
果然諸毛餐黑水頃刻滿面消秋霜我聞度世真神仙
不忍獨自作少年又聞堯染臯陶舜染禹彼此沾濡聖
如許先生報國恩無量常恐年衰意惆悵但見青蔥
繞頰生掀髯一笑心還壯小人有母忘兒衰視我花甲
如嬰孩得教綠髻同潘岳勝舞斑衣學老萊旁人不知
笑吃吃道此兩人媚側室噫吁嘻君不見從古友朋膠
漆情紛紛擾擾堅白鳴何如同讀太元經

卧鐘

一鐘倒卧鍾山坳后藥敲後無人敲宮商滿腹悄無語

草蟲亂叫秋天高我來駐馬急拊視藥乳模糊土花紫
篆文隱隱莓苔封露漬斑斑鉛水洗口寬千石容有餘
身重萬人扶不起憶昔橫陳寢殿中四廂九奏聲隆隆
曾招醴鼓聲相應曾喚宮娥睡不濃一朝世事浮雲過
太常樂散金甌破尙有釣天夢未終可憐小刼身先墮
鳥踏還疑鳬氏鐫雪飛似伴袁安卧飄泊泥沙不計年
摩挲幾度遇神仙牧童手小爭來擊佛子樓低不敢懸
我聞禹鼎長淪沒何況銅駝困荆棘聾俗誰爲傾耳人
長眠且入無雷國別汝回頭感不勝千秋老物定神靈
年年霜降商山日可作鯨魚吼一聲

寄陝西撫軍畢秋帆先生兼呈令舅張少儀觀察

九天臚唱掣金鰲，三輔風雲擁節旄。
殿上策猶推賈董，關中功已重蕭曹。
軍興五載民如忘，章奏千回帝總褒。
想見終南山色裡，一輪卿月比前高。

春滿軍門有所思，百花頭上看花時。
采風手纂長安志，

感舊情深吉甫詩。

公修西安志梓尹文端公詩

已屈君平參幕府，

冬友

更招小戴作經師。

咸

知公偶折金河柳，也折人間第一

枝。

下官銜本隸旌麾，廿載身因奉母歸。
一面未曾瞻華嶽，八行先自賜珠璣。
游仙夢記風前遠，隔水琴彈海上稀。
多感羔裘千里贈，教僮暫脫芰荷衣。

聽說張敷住渭陽，故人振觸九回腸。
自然杖履身還健，

多少雲龍事未忘半世韶華同逝水一門宅相好輝光
煩公代寄滄桑信最小袁絲髯已蒼

附少儀觀察和詩

海上相期釣六鰲十年謂可建旌旄致身公自登蓬
閣草檄吾偏雜掾曹袁纔何曾羸陸賈樂章漫擬賦
王褒當年誰及終軍少作賦聲摩漢殿高

白下於今有去思中牟化美漢京時直聲三上軍門
牘儒雅頻賡相國詩鰲面老人稱衆母烏衣弟子奉
嚴師尋春杜牧非遲暮幾度吟憐綠滿枝

懶從關塞擁高麾遽買春江一棹歸繞座光華發
囊鼎驚人詞賦擅璇璣神仙伴侶閨房滿鐘鼓園林俗

客稀盤谷有親康且壽肯將公袞換萊衣

笛聲淒切聽山陽感舊懷人幾斷腸

四十年來京華故人零落殆盡

世閱冰霜元易老交深貧賤最難忘丹山近企將雛信錦字遙分照乘光一事報君堪大噱齒牙落盡似

張蒼

偶閱廣輿記載盤古冢凡有三處其附會可知然題目自佳戲題一絕

無人挾長居前輩有力開天看混茫底事一坏先作俑神仙留着讓軒皇

荅朱海客先生見寄

未見投一札已見投一詩先生于鄙人殷殷如有私我

昨過京口離家月已期忍住欲歸心走叩先生扉先生
方擁帳說經爲人師地居寶晉齋米顛所留貽卷簾金
焦落穿庭鳥雀飛呼兒出見我森然兩瓊枝解作銀鈎
楷能歌幼婦辭我受僕夫促身坐心已馳胸中千萬語
如蠶未吐絲不恨相別速只恨相逢遲何時得重來定
有江雲知

香亭弟僦居白門來往甚懽今年服闋有仍赴蜀
中別駕之行予老矣難乎爲別賦詩送之

送汝萬里行戴我一頭雪未免老人情含笑看金玦憶
昔壽春去尙且情依依矧今蜀道難知汝幾時歸汝歸
自有時我年恐難待阿通才三齡仙風吹不大何田復

何圃幾書又幾槩錄冊交與汝汝應知我心

汝家多弟昆我家多姊妹從子及孤甥因之各成隊一
人一婚嫁向平力不勝若不藉微祿此累何由清汝非
貪官職衰年捨我去我非吝一厘不肯留弟住展轉復
展轉兩家事艱難羨殺脊令鳥雙飛共一山

前年弟歸來買園與我隣公然東西屋兩邊住機雲風
和兄嫂往雨晴叔姒來庖奴鬪羹好小婢報花開似此
天倫樂一日抵千霜如何青天月團圓難久長池塘春
草生阿連不可見分後紫荆花風前顏色變

歐公居頰上瀧岡情無人似昧首邱義論者常紛紛我
于隨園旁卜兆墓顯考生塋附其間較歐稍爲好終竟

大母墓尙在西湖西歲雖遣人祭此心常悽悽兩家小兒女結婚須故鄉庶幾寒食節容易紙錢將

隨園兩山凹垣牆無所施邱壑雖云佳居室非所宜笑我烟霞癖經營三十春一水與一石處處精神存古來高人宅多捨作菴若我乃無懷民豈是佞佛者乞汝改家廟祀我于西齋或者峴山巔叔子魂歸來

仙人有九障虛名是一端宏景曾此累而我亦復然挂冠三十載著書一尺餘已付麻沙本憑人作毀譽所嫌在官日惠民無寸功輿歌太詭衆聞之兩頰紅宋儒伊川子作狀狀伯醇傳兄無溢詞所貴傳其真

我年十八時叔父客西粵託我身後事諄諄寄手札此

札藏篋內隨身不敢離燕南與趙北時時偷眼窺迎叔
歸塋畢拜向靈前焚泣陳無所負可慰九原人我今學
叔父一一付驪歌望弟學阿兄弟意將如何

意有所得襍書數絕句

一樣三株木筆栽兩株萎謝一株開分明草木尙如此
何況人間才不才

擲果當年事已休閒來曳杖水邊遊無端樹有撩人意
紅杏一丸打白頭

滕六才終異二飄枝枝修竹劾芭蕉階前只有薇蕨草
偏在風中不動搖

自尋低竹補籬笆雨後高雲襯落霞驚去鴛鴦真得意

雙雙全上合懽花

碧桐一樹倚雲端五月離離雪蘊攢壓屋濃香高百尺
世人忘却當花看

老去年來日力微回黃轉綠認依稀落花裊着游絲颺
錯認空中蝴蝶飛

全家試水泛輕舠小妹張篷阿姊推喜極兒童雙手戰
釣竿絲上一蝦跳

常自閒中玩物情碧欄杆外作游行香蘭性愛風前種
爭怪詩人不好名

莫說光陰去不還少年情景在詩篇燈痕酒影春宵夢
一度謳吟一宛然

孫勗堂舍人殉難金川其門人汪燾以遺像屬題
舉世紛紛都畫像畫成幾個傳人樣汪倫持像索我題
卷雖未展神先王道有先師孫太初槃槃才子擅名譽
曾將水榭風廊意寫作人間行樂圖一朝捧檄馳西蜀
正值天兵剿蠻觸強著書生短後衣也隨主將抽金僕
妖星半夜落危碣疋馬無聲陷賊巢束手姜維投鎧仗
甘心光弼用靴刀泣語家奴莫悽愴男兒報國真無狀
速取冠巾一物歸好教兒女招冤孽天恩頃刻下明
堂錫典榮生綽楔光可憐太死終軍早不見頭懸南越
王門生風義高前古展卷淒涼淚如雨豈料當初翰墨
緣竟成此日丹青惜我與斯人一見難敬題短句發長

嘆願將此本描千幅當作金鑄范蠡看

揚州康山詩爲主人江春作

青山如高士不肯居城中難得邗江城中藏一華峯相
傳棲息者昔爲康武功于今屬江淹規址增穹隆綺寮
花歷歷月榭烟重重我來逢日暮海棠開深紅登九
層臺恍入凌霄宮近覽一郡盡遠極諸天空指掌月欲
墮乘雲仙可逢凜乎難久留此身非孤鴻

竹垞曾題詩有約江春到主人名姓同巧合如天造在
昔楊憑園香山來憑眺蕭復舊樓臺王縉領其妙江山
怕冷落羅綺須炫耀君今繼前徽風雅有全調宜乎海
內人爭買邗江棹上迎丞相車下招居士屬分領邱壑

情合參仁智樂燈紅花不落酒滿月常照康公如有知
凌雲應一笑

贈朱子穎轉運卽以留別

曾騎竹馬侍尊公五十年華逝水同敢以通家參末坐

偶因招隱接清風

牧十二歲受知于尊人
糧儲公今六十二矣

平山影落雙

旌上燕寢秋生一雁中難得王濛齊抗手開樽談到漏

聲終

謂夢樓
太守

平生秋月比襟懷小李丹青大謝才愛向蜀江看峽險

嬾從秦棧叱車回九重語密恩仇忘

公弔某制府云三
年罪竟能泡我一

語何曾敢負公萬里遊多眼界開莫怪使君風骨冷泰山頂上

抱雲來

讀罷秋原校獵篇三唐音節八風宣雲中金翅身摩地
塞上霜笳響入天惜我雄心聽已老借公如意舞猶顛
相傳手射潢池賊真個天狼早避弦天狼早避絃公集中句
白髮征夫別畫堂主人情重費周章佩貽屈子三湘草
心表南豐一瓣香蒙贈素蘭香珠出岫雲仍歸舊壑入林鳥尙
戀斜陽從今地有鶯花主杜牧揚州夢正長

舟中聞鐘聲有感于先賢考亭之語賦詩箴之有
朱子在南安夜聞鐘聲大懼曰便覺此心把握
不住

半夜聞鐘響此心隨鐘徃彼來非惡聲此去非妄想緣
何考亭子自慙把不禁分明儒學淺墮入禪學深子在

齊聞韶何常不動心

哭劉介菴

有序

君名景福山西人歷宰福清江浦諸邑最後降
真州丞以壽終

善人與道適不在親簡編醉人墜無傷由于其天全我
友介菴子通籍五十年牽絲閩海地投老邗江邊其人
性夷垢土色而敦顏不以矯虔遲不以苛廉傳所到識
政體吏民靜且便清俸一土手萬弩如開弦縣僅爲主
進門幹替持錢偶聽半曲佳柘枝舞欲顛偶愛一伶美
纏頭費百千堂前燈似海棠下酒成川寧可斷炊火不
可無管絃旁人代眉蹙慮其生計艱君但掉頭笑萬事

且由天未渴莫掘井未寒莫思棉卿自行卿法我自有
我憐果然負課萬竟能脫罪愆弄兒將恩報破產來爭
先大吏知君愿當作老物憐藍田縣丞記許其讀終篇
古稀已過四才命將車懸朝雖將車懸夕已歸道山畢
竟行樂死終身無憂煎我昔宰棠邑年少如任延君來
作交代見若平生懼受馬不數齒穿錢不算緡感君意
豪健使我心纏綿從此忘客主雲龍樂事偏有時我外
出歸家鼓喧闐問是何爲者君代張華筵子旗與子尾
兩室如一焉歷歷事雖往依依夢常牽今秋君病篤我
呼渡江船握手不能語猶問老母安遲君半日死補我
一面緣方知素心人永訣非偶然君家汾晉住旅櫬何

時還有妾未四十鬢髮垂雙肩有婿治喪事踴躍張空拳未能計日後能無悲當前我亦六十叟海內無同官知作幾時別老泪空涓涓

黃信生獨立圖

四瀆水獨流一月光獨吐只緣依傍空獨有萬萬古我友信生子清才老吳楚瘦削若植鰭飄飄欲霞舉偶畫獨立圖四顧無儕伍敢希魏裴俠高標立天府庶幾唐杜陵蒼茫咏詩苦我亦孤詣人蹢然手獨舞平生所知交落落均堪數甘爲夔足一恥作晉耦五何時把臂行全入無雙譜

秋蚊

白鳥秋何急營營若有尋貪官衰世態刺客暮年心附
煖還依帳愁寒更苦吟憐他小蟲豸也有去來今

偶成

白髮對花落悄然心不安未知來歲發可有老夫看欲
掃且停帚將歸更繞欄多情蜂與蝶伴我忍春寒

病足

明明聖賢途見到行不到誰知大體然小體亦相效右
足忽病瘡左足徒踟蹰一柱雖支梁孤櫟難移棹望山
無時登聞酒先辭召想栽花近床妬殺竿垂釣豈無張
湯摩難學漢王跳未免山魃欺兼招跛隨弔我道身何
衰六十先已耄蕩蕩天門開捷足讓年少平平王路寬

蹀躞疑陷淖羨彼蟲豸行升堂還入奧輪他落葉飛隨
風尙騰趲一履一跼腓將爲管子笑我謂子胡然用短
最扼要兀者古王駘喪足乃入道更有臚將軍斫白張
旗纛珠玉本無脛從從走燕趙何況我山翁高風原坐
嘯但宜卧憺憺不煩行僬僬借此自夷猶足疾奚須療
永斷沒階趨將毋非禮蹈例可免送迎心堪釋煩躁靜
處光陰多閒中著作妙弟子自來學先生免往教雖非
希哲貴居家時乘轎或惹美人憐碧玉回身抱

癰

頑癰如頑妻一來不可黜附體二十年爬搔晝夜微病
類伯牛癰形同豫讓漆其性更陰狠乘隙乃作賊不生

面目間似畏見日月好據尻厓腫僂蟻蚤所不屑如草多
蔓延如蠶慣齧齧非仇苦糾纏非親強狎牖知我肅大
賓故意將肘掣俾縮敝禪中王猛如捫虱有時卧香衾
蠕蠕作蟲囓勦我侍者勞麻姑爪盡折我怒攻討之克
敵占見血初將礬石敷繼用毒藥熨痛極癢始差東平
西又凸小敗勢轉張暫稀發愈密神農藥不靈扁鵲醫
無術有客爲我言除惡何須絕人生食烟火疇能免濕
熱借彼作消導亦是免他疾譬如大廈居不必熏鼠穴
又如護水隄區瀦任宣洩矧是皮膚累並非心腹孽何
不包容之聽其自生滅我亦無奈何姑且聽客說甘作
痕癢人永少清淨日吾及汝偕亡一笑萬事畢

竹林寺

晚過竹林寺斜陽屋角沉風燈紅不定烟柳綠彌深僧
少磬常寂樹多晴亦陰耳根疑佛語鈴鐸有清音

平生觀書必摘錄之歲月旣多卷頁繁重存棄兩
難感而賦詩

愛書故看書看罷書已走何以強留之廢心轉用手悠
悠三十年兀兀極卯酉食鷄必取跖占星常指斗有如
養蜜蜂百花無不有但可備采掇不必計用否又如大
官庖甘苦皆上口甘旨盈萬千搜牢費八九一朝卷束
之凄然傷白首欲作榴下藏未必六丁守欲當堯典殉
空與骨俱朽不如問蒼蒼教吾傳某某

淮上權使伊簾也先生手書索枚全集先生乃故
長官李觀察永標甥也衡恩感舊奉寄二章

淮北牙旗捲朔風淮南招隱到山中卅年名姓能知我

一代風騷信屬公

公札中有三十年來久欽學業之語

手蒼長箋揮倚馬

心憐小技問雕蟲緣何卿月當天滿偏焰幽棲草一叢

御李當年有舊恩曾持手板謁清塵誰知屏後窺探客

卽是

天家柱石臣

公云曾在李公屏後見枚

老去自憐知已盡書

來重見愛才真何當遠泛清江棹白髮追陪話夙因

題陳省齋太守雲溪書屋圖

憶作羸官日曾經侍大賢榮尊爭往返簿領共周旋彼
此形骸忘官階禮數捐先生方綰綬賤子早歸田分手

情猶摯推襟意更憐簫聲朝置酒燭影夜題箋九月花
黃日三春雨細天携孫入山裡問字到堂前玉貌驚雕
武鴻才愛服虔餘情忝媒妁納幣聘嬋娟公長孫熙娶
于錢氏枚爲
執冉冉雲烟度悠悠歲月遷量移山左地辜權水衡錢
語笑風吹斷音書雁代傳卅年如夢過八秩未華顛剩
有丹青畫能描陸地仙庚桑風拂拂丙舍樹連連童子
將書立閒鷗倚檻眠貌如松鶴健瞳映水雲鮮故吏雖
衰矣披圖尙宛然願言打雙槳來訪五湖烟

覺衰

甚矣吾衰百不如齒牙零落髭毛疎花間愛叟隨身杖
燈下愁看小字書偏把事忘應記處慣教氣損劇談餘

須知逝者如斯耳老說聰強總是虛

挽梅式菴

讀史研經四十春終嫌竹素少傳真九原此去無他樂
看見古來無限人

題畫

村落晚晴天桃花映水鮮牧童何處去牛背一鷗眠

謝胡誠齋觀察送瓜

綠沉瓜向草廬投捧得雕盤暑漸收碧玉幾圓隨手削
紅霞一嚼滿庭秋分明西域來佳種慚愧東陵作故侯
願着荷衣捧仙果南皮池上奉清遊

再謝賜鮮荔枝

投瓜慙未報瓊瑤仙荔重教擘絳綃香色品來真一絕
海風吹未過三朝形同玉李膚尤嫩味借甘棠露不消
欲假公恩咏嘉樹試將仙核種山椒

養馬圖

養馬真全養士情香其供奉要分明一挑芻草三升豆
莫想神龍輕死生

十二月十五夜

沉沉更鼓急漸漸人聲絕吹燈牕更明月照一天雪
永福菴贈餐尊上人

山髻當牕滿松欒落袖輕老僧雖寂寞歸有一花迎

元旦

暉暉晴日表元辰漸漸柴門草色新
閨歲梅花猶蓓蕾
通宵燭影尙橫陳公然白髮三朝客
又領東風一日春
未賀賓朋先賀我堂前九十四齡親

喜魚門主事改官編修

一行丹詔下蘭臺海內風人笑口開
爭說聖朝能得士此官終見此人來

明中官降暗中遷天眼遲開四十年
可似修真老張果
白頭才許作雲仙

笑問花磚影若何當年老子也婆娑
忝爲先輩無多日
只隔迢迢十六科

荅大廷尉王蘭泉先生見寄詩扇

有序

先生名昶以吏部郎從阿將軍桂征金川同行
者趙文哲等俱歿于陣而先生獨奏凱旋論功

擢廷尉

誰佐平西第一功漢家廷尉重于公心憐舊雨貽紈扇
身出重圍感塞翁皓首軍機雙鬢雪高冠孔翠一翎風
遙知清瘦書生貌畫上凌烟便不同

公以軍功賜孔雀翎圖形內府

殺賊金川常壯遊寶刀光裡萬豺豸雪山看到中華外
鼓角聽殘白帝秋半夜天星摧上將一軍風鶴起深愁
斯時代作孤臣想可有生還兩字不

且喜謀參李藥師生擒頡利返牙旗手書露布三邊讀
甲洗銀河萬馬知草檄已完孫楚事從軍應賦仲宣詩

何嘗洗耳華堂上聽說蠻溪苦鬪時

故人踪跡久離羣記否蕭齋酒半醺打漿舟忘桃葉迎

婢事磨崖字許小山分公鑄澄碧泉三思量鴻爪痕常

在傳說鶯遷信屢聞此後袁絲休惜別舉頭天上見卿雲

讀道古堂集弔杭堇浦先生

平子才華賦兩京禮堂經義屬康成殿前放膽陳封事
海內甘心奉盛名一代官多徵辟少百年人重甲科輕
等身著作分明在可學歐公畏後生

歸隱湖山笑眼開誰知方朔歲星哉橫衝一世談天口
生就千秋數典才萬卷堆中碁局響三貂座上緼袍來

傷心此日風流盡江左靈光半夜臺

新正十日聞陶衡川孝廉之訃因思去年秦學士
礪泉梅式菴公子皆先後委化曹子桓云旣傷逝
者行自念也感賦一詩

一度秋風一逝波故人零落漸無多蒼天留我忙何事
日日桓伊唱挽歌

卽事

盆梅三株開滿房主人坐對心相忘偶然入內女兒怪
問爺何故衣裳香

寄江澄里主人借西磧山莊

當年曾被梅花引得到蓬萊最上巔今日將身樓下界

不禁清夢繞諸天

幸喜劉盧仙籍通舊相知是主人翁數行代勒嫺嬛記

也算磨崖第一功

主人命作西磧山莊記

三年聞說無人住綠滿空庭草未除我與閒鷗謀拜賜
水邊林下各分居

平生踪跡等搏沙料理雲烟頗自夸豫辦青溪菖葉帚
爲君石上掃殘花

騰嘯臺高萬嶺低獨眠人往怕孤悽未知紫府清嚴地
可許劉綱挈小妻

伯通廡下暫棲遲敢學鷦鷯占一枝幾朶雲生幾楓落
定書花葉報君知

不借荊州借太湖買山有券借山無筵知三萬六千頃
一笑公然付老夫

哭陳省齋太守

八旬解組住鴛湖書屋雲溪有畫圖忽報神仙歸碧落
應教故吏服衰纊文孫才大功名晚謂梅太守官清老
興孤白髮參軍倍悽絕同僚海內一人無

題亡友梅式菴畫冊

數盡天難問才高藝自精斯人雖萎謝遺墨尙縱橫氣
得山川秀神含水木清休言小遊戲卽此見生平
識面長安日題襟白下時卅年如昨耳一別竟何之絕
好佳公子居然老畫師相知慙未盡頭白泣衰絲

德定圃先生卸漕帥事巡撫閩中與夫人雙壽索

詩

蕭何轉漕卸雙旌常袞頌春到越城半壁東南恩已徧
六旬花甲歲初更文章自得中和氣瀟灑兼辭幹濟名
此日軍門牙纛靜花苗螺女盡懽聲

憶昔追隨步木天一番春夢尙依然後生許我稱名士

前輩驚公更少年

在翰林時枚年二十四公年二十一閭闔門多鸞振翼

公歷內務府國子監吏兵工各衙門

溪山秋老鶴歸田蓬萊久別還相認

邂逅揚州又拍肩

丁丑公扈行宮門外

儂家仲氏學吹簫也領春風侍絳帷玉鑑冰衡無遁物
珊瑚鐵網有高枝生徒負笈來千里兄弟焚香禮一師

常共子由聽雨坐歐陽門下說恩知

家弟樹癸未春
剛出公門下

徵詩箋到士林聞爭寫
堆池琬琰文共仰金仙飄綠髮
更看王母擁紅雲
花開並蒂春難老
酒進雙卮飲易醺
慙愧衰絲相隔遠
吹簫輸與武夷君

六月菊

寒菊公然同暑黃
蒼蠅側翅遠相望
東籬共訝西風早
秋士偏貪夏日長
試把一燈來照影
焉知六月不飛霜
數枝冷艷當階立
愁殺紅蓮不敢香

題夏山圖贈曹谷堂

夏山有景奇如許
畫家有手誰能取
董生北苑貌得之
藏在人間忽飛舉
畫雖飛人能摹
徐王一手成此圖
我

常嚴冬雪後展卷看宛若四五月行深山叢叢萬木
雨欲滴莽莽一氣雲相連扁舟何處來潏漾迷濛天牧
童驅黃牛後先分著鞭板橋有人烟中語茅屋幾椽花
外偏遠望層巒疊嶂不知幾千里對之但覺飛濤空翠
生衣間據云臨摹此本已第七墨彩淋漓猶繞筆董生
委化雖千年紙上招呼如欲出谷堂先生信解人上手
當作共球珍當頭一趺妙絕倫更索我詩張其軍我見
此本勝見真恍如身到桃花源急驅烟墨題數言願君
傳之世世萬子孫

梨城課士圖爲盧太守存齋題

君之外舅古賢者曾以封章薦終賈

廣西撫軍金公

君之先人

撫我鄉

韓焯

至今遺愛民難忘爾我通家未伴面四十

年來才一見往事都從夢裡談回頭幾度滄桑變授我
槩城課士圖命題詩句當筌字開看一片青衿色桃李
公門萬萬株泮宮栽栽起兩廡羅羅疎干旌來子子儼
從走跡跡困人繫其馬校官捋其鬚或執經以請益或
握管而躊躇更有嬖婁小公子手持如意來嬉娛鱣堂
講罷高揚觶江風遠送斜陽至使君欲起尙留連恐有
秀才來問字此事依稀十數年使君五馬賦驚遷詣學
雖無何武駕聞歌還說子游賢我亦當年一貧士蒙師
教育苦如此白首難忘知已恩長安寄信訪兒孫今朝
得遇師門婿不覺潸然涕如雨宛然舊院一蒼頭忽見

小郎如見主更喜憐才意思同丹青畫出舊家風他年
官到中丞日定有聲名繼兩公

哭程荆南明府

望見金焦眼便紅哭君兩世半年中

尊人春間先去世

詩才一

代清無敵德政三湘感未終宦海波濤天外落騷壇旗
幟眼前空去時畧說西歸意五百袈裟候下風

歿時見五百僧

迎相

屈指交情十七年同吟同醉更同眠風窻折竹疑聽雪
月夜乘槎欲上天無盡燈常明綺席有情花亦乞吟箋
如何小別橫塘雨一隔音塵便杳然

題袁蕙纈南湖圖

吾宗有賢者一見使人古學爲漢唐文筆力如牛弩屢
困公車試再上慙不武示我南湖圖其中有衡宇將終
老于斯蕭然樂環堵我偶展丹青恍若遊元圃蒼蒼遠
峰蹲落落長松舞閒倚石爲梁靜看雲出府花影人過
橋水聲舟蕩槳平生未讀書此間真可補直是羲軒民
豈徒羊求伍非飲山泉甘那知井泉苦寄語樵父仙我
來風莫阻擬到溪流邊同把游魚數

七月二十三日阿遲生

六十兒生太覺遲卽將遲字喚吾兒高祿久祀心都倦
燕姑初來夢恰奇鍾姬入門前一日悔賣渠書還想贖
怕看湯餅轉生悲夢人以桂子與之賣堂握手彌留際猶問懸弧是幾時

海內爭傳伯道名今朝前雪賦添丁長成未必衰翁見
有後姑教薄俗聽老樹著花秋色好餘霞返炤暮山青
豆盧寧傳分明在合授雙雛各一經

尹三公子璞齋觀察蕪湖相晤白門喜而有贈

折花使者遞名箋知道通家見有緣

蒔花人李姓者先
三日傳到名紙

廿載青溪成契濶一朝丹詔許旬宣渡江歷歷前生

夢到眼依依故國天聽得耆民私地說當時公子最翩翩

翩

觀察晨趨帥府忙軍人一半喚三郎竭來門外聽官鼓
恍憶兒時上學堂洗硯池應留墨漬題牆字可剩偏旁
西園舊是君家物早晚還君望正長

相公門下老袁絲也算甘棠樹一枝沿路先教探安否
升堂各自認鬚眉始來悲喜燈俱笑說到滄桑酒不辭
重入桃源莫相訝仙山樓閣倍參差

此去牙旗鎮上游天門山色捲簾收擬招荆樹來千里

更奉慈雲擁八騶

君奏請六弟似村奉太夫人就養

訪我定推雙槩月

開關先放一輪秋何時得遂詩人志把筆同登太白樓

附觀察和韻詩

名園粉壁舊題箋宦蹟重尋信夙緣載酒居然同杜
牧趨庭猶記認彭宣燈明水榭三更夜桂放秦淮八
月天策馬來朝還過訪蒨監深處影聯翩

買得青山日日忙江南遊客舊清郎英雄晚計成芳

野巖壑遺身戀草堂解組半生花
遶座校書他日子
隨旁我來正值懸弧候莫嘆如絲髮長

遙從山館寫烏絲似折梅花贈遠枝
千里縱如同握手一尊那得共開眉
官廳翻見身多累親老難言祿
易辭極目吳頭與楚尾嵐光隱隱水差差

石頭城畔溯前遊到處風光入眼收
畫舫西園慙倒屣油幢北府悵鳴騶
重來頓覺河山異高宴空驚草木
秋幸有故人袁淑在朗吟同上謝公樓

甘露寺感舊呈夢樓主人

并序

已未冬予乞假歸娶路過京口值商寶意前輩
爲郡中司馬命公子某陪遊甘露寺今四十年

矣史前一日王夢樓侍講招飲此間追憶前
遊悽然有作

記得當年此地經雪花寒重錦袍輕酒邊綠髻初垂影
山上蒼松半未生卅載韶光春易過一條狹磴老難行
憑闌暗轉衷腸事江水無情浪有聲

木天署裡老詩翁會綰仙符碧海東要把江山付詞客
特教公子伴花驄西州賓從人重到北海渠尊事已空
難得多情王太守開筵重與醉西風

舟過平望訪張看雲居士不知其已亡也留詩哭
之

滿擬故人在停舟問起居誰知雙目瞶已是一年餘總

帳風前卷殘花雨後疎九原知我到悲喜定何如

弱冠長安遇雛壇第七人

丙辰在李玉洲先生家與曹麟書沈叔園諸公結吟社

各彈遊子淚全惜客中身脫手一錢贈分甘半盞春至今回首憶風義感雷陳

鶯脰湖邊屋高樓見水光卅年三領畧萬事幾滄桑棋罷柯雖爛舟移壑未藏請看鄴侯架堆積尙琳琅

桑榆收晚景作客古揚州畫重連城壁詩輕萬戶侯看花醉金谷築舍老菟裘華表覓應在年年化鶴遊

松下作

小住倉山畔悠悠三十春蒼松都已老何況種松人

梅

小倉山房 卷二十一 三
正月東風柳未芽一庭梅影雪橫斜重他身分緣何事
只爲能開冷處花

讀淮陰侯傳

滅楚身提百萬師知公含笑無奇英雄第一開心事
撒手千金報德時

老來

老來不肯落言詮一月詩才一兩篇我不覓詩詩覓我
始知天籟本天然

帆

一葉帆高掛千舡水作聲靜聞舟子唱猛見浪花迎張
處休教滿收時自覺輕從來人失足轉在順風行

雨中志感

徹夜淋漓屋瓦鳴
雨如相約赴清明
山中易放惟花柳
世上難收是姓名
月桂根高終不落
沙鷗船過也虛驚
放翁自有安身法
一個齋顏心太平

花朝日戲諸姬

花朝時節祭花神
片片紅羅縛樹身
爭獻百花生日酒
不知誰是似花人

阻風京口

已出三江口
難拋百丈牽
一帆如懶婦
終日但高眠